



Komunikadu Imprensa

Periodu : Setembru 2011

Publikasaun : 4 Outubru 2011

JSMP Fasilita Treinamentu ba Estudante Sekundária Iha Sub Distritu Atauro

Iha loron 22 fulan Setembru 2011 JSMP liu husi Unidade Asisténisa Legál ba Vítima (VSS) hala'o treinamentu ba estudante Eskola Sekundária 99 Atauro. Partisipante sira iha treinamentu ne'e hamutuk ema nain 33.

Tuir Diretór JSMP nia hanoin katak *'treinamentu ida ne'e iha objetivu atu hasa'e koñesementu estudante sira nian konabá lei formál ne'ebé hakerek ona hodi bandu ema atu halo hahalok krime iha kontextu uma laran.*

Aliende ne'e, tanbá hare katak, labarik juventude sira maka dala barak liu sai risku ba violénsia bázeia ba jéneru, no mós vítima sira ne'ebé hela iha area rurais dala barak la hatene atu prosesa sira nia kazu tuir sistema justisa formál.'

Aprezentasaun materi ba treinamentu ne'e inklui lei nasional no internasionál sira ne'ebé mak relevante liu ba asuntu violénsia bazeia ba jéneru. Materia ne'e mós inklui infomasaun konabá estadu direitu, igualdade jéneru, knaar orgaun soberanu haat mak hanesan Prezidente Repúblika, Parlamentu Nasionál, Governu, no Tribunal, no mós knaar ajente prosesimal no autoridade judisiária. Aliende ne'e, JSMP/VSS esplika mós ba partisipante sira konabá prosesu kazu krime no kazu sivíl tuir sistema justisa formal iha Timór Lesté.

Aleinde ne'e, treinamentu mós inklui matéria báziku ba estudante sira wainhira remata estudu iha nivel sekundária atu kontinua ba universidade karik sai ona hanesan bukae wanhira hili fakuldade direitu.

Iha parte seluk, representante Diretór Eskola Sekundária 99 Atauro apresia teb-tebes ho prezensa JSMP ne'ebé maka bele fahe ona informasaun ba estudante sira atu nune'é sira bele kumpriende diak liu tan lalaok sistema justisa formál. Aleinde ne'e mós nia sujere ba JSMP atu bele fasilita treinamentu hanesan ba professor/a sira, tanbá sira mós sedauk kumpriende didiak konabá asuntu refere.

Iha prosesu ne'e JSMP nota katak, estudante sira antusiasmu tebes hodi rona informasaun husi fasilitadór, tanbá treinamentu refere foin dahuluk sira hetan. Aliende ne'e estudante sira mós ativu teb-tebes hodi halo diskusaun durante prosesu treinamentu nia laran.

JSMP iha esperansa bo'ot katak ho treinamentu hirak ne'e bele aumenta diak tan koñesimentu no bele hasa'e kapasidade estudante atu nune'é sira mós bele kontribui ba iha setór justisa.

Treinamentu ne'e realiza tanbá hetan apoiu finaseiru husi MDGIF liu husi UNFPA.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Email; Luis@jsmp.minihub.org

Landline; 3323883/7295795